

Onde hai libros hai futuro

Escrito por Redaccion @valminorinfo
Luns, 08 Novembro 2010 05:52



Se un neno non pode ler tranquilamente 60 palabras por minuto e comprender o que o texto di, dificilmente rematará os seus estudos básicos e probablemente terá moitos problemas de acceso nos mercados de traballo segundo un [informe](#) sobre sociedade e ensino elaborado polo Banco Mundial .

O desafío non ten fronteiras, e no Val Miñor botou a andar esta semana a campaña [Onde hai libros hai futuro](#)

. Unha iniciativa de Espazo Lectura que ten por obxectivo reflexionar xunto coas nais e pais dos nenos en idade escolar da importancia das actividades familiares cara ao fomento da lectura, segundo afirmou a Valminor.info a súa presidenta a profesora Concha Costas.

“O libro ten que estar presente na vida familiar dende que o neno é un bebé e acompañalo ao longo da súa vida, porque nestes primeiros tempos xerminan as súas futuras competencias como lector”, reflexionou Costas.

Algúns datos recollidos na última [pescuda](#) do Ministerio de Cultura de España permiten aquilatar a necesidade da campaña: a metade dos españois entre 16 e 24 anos están fora do sistema de ensino, e o sector máis afectado polo paro é aquel que rexistra persoas que non acabaron a formación secundaria. Por outra banda, a relación comprensión e competencia lectora está directamente relacionada có desenvolvemento formativo das persoas, segundo o [estudo](#)

das Nacións Unidas que levou a nomear o presente decenio “Da Educación para o Desenvolvemento Sostible”.

Aínda estes parámetros, a sociedade non reflicte a súa importancia nas enquisas valorativas dos maiores problemas do país. Apenas un 5% dos enquisados na última pescuda do [Centro de Investigaciones Sociológicas](#) , mostrou sensibilidade polo tema.

Onde hai libros hai futuro

Escrito por Redaccion @valminorinfo
Luns, 08 Novembro 2010 05:52



Onde hai libros hai futuro é froito dun traballo de planificación de Espazo Lectura, asociación na que participan voluntariamente especialistas nas áreas do ensino e no eido cultural, pero tamén moitas nais e pais que a integran dende a súa formación.

Dentro da campaña inclúese a edición de 4000 exemplares dunha guía dirixida aos adultos con consellos e recomendacións para este obxectivo, deseñada como decálogo.

A distribución desta guía irá acompañada dun programa de charlas-coloquio polos centros de ensino da bisbarra, tarefa que a asociación encomendou ao profesor Anxo Iglesias Marino (membro da directiva), e a propia presidenta Concha Costas. Nos coloquios se ofrecerán algunhas estratexias para traballar a lectura como unha alternativa máis de ocio, pero sobre todo como un adestramento para mellorar a comprensión lectora e favorecer así a necesaria autonomía e competencia dos nenos en todos os ámbitos, tamén no escolar.

O ciclo de charlas-coloquio comezou este pasado martes 2 de novembro, no CEIP A Cruz-Camos e continuará o próximo martes 9 de novembro, ás 16:30 horas, no CEIP de Belesar. Ao longo das próximas semanas as charlas seguirán por diferentes centros de ensino da zona, para tentar dinamizar o papel das nais e pais neste ámbito.